

**LA**  
**ODIINDA KOMEDIO DI**  
**KARNOBRISES TESTOSTERONIDES;**  
**OD,**

**UNIVERSO BONE FUTUITA**



*Obcenajo teatral en kin akti da*

**BRIAN E. DRAKE**



Creative Commons 2019 by Brian E. Drake  
Attribution-NonCommercial-ShareAlike 4.0 Unported  
International

The Oxford Rationalist  
56 Albany Street  
Oxford, NY 13830 USA  
(607) 843-2636  
[brian.eric.drake@gmail.com](mailto:brian.eric.drake@gmail.com)

**LA**  
**ODIINDA KOMEDIO DI**  
**KARNOBRISES**  
**TESTOSTERONIDES;**

OD,  
UNIVERSO BONE FUTUITA

*Obcenajo teatral en kin akti da*

BRIAN E. DRAKE





## ***Roli***

Karnobrises Testosteronides  
Mildrenda  
Imperiestro di Chinia  
Imperiestro di Norvegia  
Kuriero  
La kapi dil ocidita Rejuli di India, Zanzibar, e  
Dakota Nordal, sur charo  
Kapitano Haldigo  
Imbrigrigllen, *sorcisto*  
Diableto  
Karbonoblanke, *magiala kavalulo fluganta*  
Demono, *vestizita kom belega muliero*  
Demoni ombratra  
Drako  
Vespo giganta  
Vespertilio giganta  
Sha de Persia  
Gargantula, *sklavo giganta*  
Du o tri militisti  
Trupo de pigmei



## UNESMA AKTO

*Eniras KARNOBRISES despitante.*

KARNOBRISES.

Ho Deo Supera, ca mondo 's fekoze tedanta!  
E me, *Karnobrises Testosteronides*, ne povas  
Kredar quante ica vivacho men tre enoyigas!  
Kad ni esas hike pozita adsur ica tero  
Nur por ke ni manjez e kakez, fornikez, oldeskez,  
E pose nur putrez sub malodoroza fangacho?  
Se nulo valoras, prefere me forte esforcos  
Ya violacar mea kulo fumanta per spado  
Kam tale durar en ca stando sensignifika.  
Do ul signifikon ni ipse ya mustas facar.  
Damnezez ti omna qui baras la voyo ad ago!  
Nun tu, *Karnobrises*, armizez tu nun e komencez  
Raptar ta senshama deino nomita Destino!  
Ne reptez kom vermo, ma donez al vermi nutraji—  
Me vice aspiros regnar ica febla mondumo;  
Vinkado okupos la hori di van eterneso.

*Eniras MILDRENDA supre.*

MILDRENDA. Saluto, kareto!

KARNOBRISES.

*Mildrenda*, felaciistino!

MILDREDA *decensas. Li embracas.*

MILDREDA. Ka tu amas me?

KARNOBRISES. Tu sentas la fosto starchita di mea pasiono.

MILDREDA. E mea sekreta valetu por tu anke pulsas.

Ma quon tu nun facas vagante adhike, e sole?

KARNOBRISES. Ho kar aperturo, me forte e fine decidis  
Ke me, *Karnobrises*, ne plus ica vivo disipos.

No, sango e povo nun kantas kansoni luranta.

MILDREDA. E quon signifikas ta vorti?

KARNOBRISES. Me regnos la mondo,  
Destruktos homaro, o kom faliinto, me mortos.

MILDREDA. Ho kar *Karnobrises*! Qua esas ta fol dementeso?

KARNOBRISES. Yes ya dementeso, e to ya hardigas me anke!

MILDREDA. Ma, ha! qua danjeri cirkondas ta tua audaco?  
Me, me plu preferas, ke maxim sekure tu restez  
Che me e do pronta por long erotika kombati.  
Ne riskez l'energio vival e karega, karulo,  
Per bela buchado por van amuzanta distrakto.

KARNOBRISES. *Mildrenda!* Tu trompas ca mea sangoz esperaji!  
[*Strangulas elu.*

MILDREDA. Ha, nul maledikin audacez dicar, *Karnobrises*.  
*Mildrenda* timante parolas por tua kar vivo.  
Ni sequez la voyo tranquila di paco e joyo  
Per tre inventiva amoro, e talmaniere  
Distraktez ni, l'una per l'altra, per simpla plezuri:  
Ka tu ya deziras vinkar? Mea karo, men vinke.  
Ka landon tre rich invadar? Ca fenduro invadez.  
E se ul masakron tu volas, nu, esez kontenta  
Buchar sendefensa, pacema rurani lokala.

KARNOBRISES. No! Nulo ma sango di la nazioni saturos!  
Me mokas ridante ta febla e van sugestaji!



MILDRENDA. Me timas, kareto! Me timas ke ca dementeso  
For-raptos la vivo mem quale ol raptis la mento.

KARNOBRISES. Ne timez, *Mildrenda!* La Glorio sumnas ni amba!  
Ka tu kun me marchos dum ke me aplastos la Fato?

MILDRENDA. Karul, tam senfunda kam mea trueto es amo!  
Se lo esas to quo advere joyigos tu, bone:  
*Mildrenda* konkordas.

KARNOBRISES. Nun brulez ta sedo, vi steli!  
*Mildrenda*, me vundos la mondo per stala espado,  
Ma tun me empalos per mea varmega paliso!

*Li pasionoze embracas.*

MILDRENDA. Ma karo, se tu tale es rezolvita, konseque,  
Por expediar tua sercho (e por kurtigar  
L'intervalo til nia koito), me donos surprizo.

KARNOBRISES. Surprizo! Quo esas? Quo esas? Quo? Quo?  
Quo quo quo?

MILDRENDA. Nun vartez, e kelke kultivez la pacienteso!  
[*Ekiras.*

KARNOBRISES. Futuesez la pacienteso ed sua kavalo!

*Ri-eniras MILDRENDA portanta Espado.*

MILDRENDA. Regardez!

KARNOBRISES. E quo? Nur mikrega pikilo? Forigez!  
La mea es multe plu granda.

MILDRENDA. Ho yes! Ma kareto,  
Nul armo forjita da homo es ica espado.  
Ol esas la forta Espado Magial di Ulriko.

KARNOBRISES. Magial!

MILDRENDA. En olima epoko, legendo naracas,

La pre-pre-pre-pre-pre-avulo Ulrik' obligesis  
Al Duko de la tre famoza Kastelaldobrando.  
Por ilu lu vinkis la vasta rejlando di India,  
Ed ibe lu prode impedis la trupi raptema  
De la spoliado di templo e sua idolo.  
Pro grand gratitudo la monstra statuo dil deo  
Mirakle movetis e donis a lu ca Espado,  
Qua, manuagata da homo kun kordio ligata  
Ad un idealo (desnobla o nobla), ta homo  
Ya darfas vinkar omna forci qui ilun afrontas.

KARNOBRISES. Ha!

MILDRENDA. Prenez ol, kar *Karnobrises*, e kun ol ca sino.

KARNOBRISES. Armizez vi kontre me, vi omna reji dil mondo!  
Rekrutez armei enorma, konstruktez mashini!  
Rangizez kontre me omna anjeli di Cielo!  
Me, me, *Karnobrises Testosteronides*, la Brava,  
Per ica Espado brilanta, e tua amoro,  
Me ganos la mondo por sodomiar per vigoro!

[*Li ekiras.*

## DUESMA AKTO

*Eniras la IMPERIESTRI DI CHINIA e di NORVEGIA de opozanta lateri.*

NORVEGIA. Sinioro de Chinia.

CHINIA. E vu de Norvegia, saluto.

NORVEGIA. Ni en ica teritorio neutra kunvenas  
Por mashinacar ul komploti apte komplotota.

CHINIA. Me sentas, ke me desnobligas la sakra me-eso,  
Montrante ul timo pro irga danjero de ita  
Fripono, la bas *Karnobrises Testosteronides*.

NORVEGIA. Ma ca *Karnobrises* devastas l'anciena nazioni  
Asiria, e Rusia, Rumania, Hungaria, Italia,  
Liguria, e Persia, Arabia spicoza, Rhod Island.  
L'Etiopiani divenis nur sedo-papero  
Por lua rumpacho tre makulizita. E la  
Galiani, Gotani, li omna es violacita.  
Romani, li es koaktata kantar por ta hundo  
Til ke sua fauci explozas e per hemoragii  
Li mortas sub sango-kaskadi tre melodioza.  
Ecepte ke ni, per strategio, komplotos komploti,  
Ka mem nia propra domeni ne ja polutata  
Vinkesos dal furio sovaja di ta maniiko?

CHINIA. Ya, lu esas energioza aborto sangoza.  
Ni mustas haltor lu.

NORVEGIA. Tre balde. [Korno sonas.

E nun quo eventas?

CHINIA. L'alarmo! L'alarmo! Quik nun *Karnobrises* avancas!

Ho, Dei, Ancestri, protektez me! Yen, me esvanas! [Esvanas.  
NORVEGIA. Poltrona Chiniano! Kuriero advenas.

*Eniras KURIERO kurante.*

NORVEGIA. Quo nova?

KURIERO. La trupi di ta *Karnobrises* avancas, karn-reda  
Per sango di nia mortinti, e kom la avano  
Lu ipsa, *Testosteronides*, en charo ek oro  
E festonizita per kapi di omna rejuli  
Vinkita! Di India, e Zanzibar, Nordal Dakota.  
Li saltas nun kom bagateli por ita bastardo! [Ekiras kurante.

NORVEGIA. Do India falis, e mem mea kara Dakota,  
Filiulo di frato di spoza di mea fratino.  
Ho abomininda, obcen *Karnobrises*, shakalo  
Qua lansas sen penso del tero tal anmi rejala!

*Eniras KARNOBRISSES en lua charo ornita per kapi.*

KARNOBRISSES. Bonega amuzo to esas, buchar grand rejuli!  
La kapi es bel tufpendaji por mea harnessi.

NORVEGIA. Ho, mal futuanto di matri!

KARNOBRISSES. He? Quale tu savas?

NORVEGIA. Ka ne esas ula fetida Inferno a qua tu  
Ne gaye abasas tu? Por ocidar ti qui Deo  
Tre saje kreabis por ke stult homaro regnesez!

KARNOBRISSES. E qua esas tu, en ta feli e fanfaronado?

NORVEGIA. Me esas la Imperiestro di sakra Norvegia,  
Rejulo di Suedia, Laponia, l'insuli nordala.

KARNOBRISSES. Ha! altra rejulo havant kalva kapo pintatra!  
Me prenos ol por la suprajo dil fosto rejala,  
Pos ke mea fosto rejala pikabos ta kulo.

NORVEGIA. Ho, manjez la feko, tu sifilisika demento!  
 KARNOBRISES. Pikant friandajo!  
 NORVEGIA. Futuez tu!  
 KARNOBRISES. Lon me ja facis,  
 Jokajo qua tordis la dorso e lezis l'anuso.  
 NORVEGIA. Me montras a tu mea kulo, Ho *Krapulibrises!*  
 Tu, monstro!  
 KARNOBRISES. E ka tu ne ja cesas ta babilacho?  
 Me stopos ta boko per mea paliso giganta.  
 NORVEGIA. Mikrajon me mordos e sputos a tua vizajo!  
 KARNOBRISES. Sat bone. [*Lu senkapigas* NORVEGIA.  
 Babilez, *Norvegia*, se nun tu deziras.  
 NORVEGIA. [*Sisanta.*] T' m'nstr'! Diabl'! 'nkore me m'm t'  
 defias!  
 KARNOBRISES. Ca bela finketo kantanta bezonas kajeto.  
 [*Pozas la kapo en ucelo-kajo.*  
 NORVEGIA. K'd es's n'lt'mpe 'l f'no di tu' m'l'gneso?  
 KARNOBRISES. Od fino di tua sencesa babilo, ka timas.  
 Charmanta ludilo tu esos por mea *Mildrenda*.  
 He, venez, siorino!

*Eniras MILDRENDA.*

MILDRENDA. La fango sangoz makulizas ta shui satina.  
 KARNOBRISES. Me furtos—pardonez—me ganos por tu  
 porto-lito.  
 Karino, me havas por tu donacajo. Regardez!  
 MILDRENDA. Ha me, plusa kapo. E hui! ol male odoras.  
 NORVEGIA. M'rb'za prostitucatino, lib'rigez ca anmo!  
 MILDRENDA. Cielo! Qua es ta bruiso?  
 KARNOBRISES. La kapo dil rejo  
 Ne cedis spirito pos ke me tranchabis la kolo,

Ankore parolas, e malgre la sango fluanta.

MILDRENDA. Advere la kozo parolas?

NORVEGIA.

Tua vulvo sikeskez

Til ke nul penis, digito, o lango eniros!

Ta boko klozeskez fixate, e cirkum l'anuso

Di ta onianto, por ke tu ed ilu eterne

Promenez sengracie per kapo an kulo por sempre!

MILDRENDA. Fiere me irus per tala maniero, sputanto.

Nam tal malediki nultempe timigos ca damo.

Saveskez: advera amoro ya vinkas mem shamo.

Ha, karo, atencez: me facis boneg epigramo!

Ma venez; me docos ta lango obscena kantar,

E ludi mem plu charmanta por me e por tu.

[*Ekiras kun* NORVEGIA.

KARNOBRISES. E nun quo? Kapitano!

*Eniras* KAPITANO HALDIGO.

HALDIGO. Me asistas, Vua Maxima Alteso!

KARNOBRISES. Qua lando nun sequas en nia listeto?

HALDIGO.

Nulo.

KARNOBRISES. Quo? Nulo?

HALDIGO.

Dakota Nordal es la lasta, Alteso.

KARNOBRISES. Kanada?

HALDIGO.

Subisis venerdie.

KARNOBRISES.

Ka Chili?

HALDIGO.

Merkurdie.

KARNOBRISES. Ni esas recente tre briska.

HALDIGO.

Yes ya, Komandero.

KARNOBRISES. Men livez.

HALDIGO.

Yes ya, Komandero. Saluti.

KARNOBRISES.

Forirez!

*Ekiras HALDIGO.*

KARNOBRISES. Nu do, me ja vinkis la tero, submisís populi,  
E nun quo? Me gaye mortigís milióni de homi,  
E plura milióni sodomiís, til ke la peniso  
Sempela es pro penetrir li sen lubrifíki.  
Ka nulo saturos ambicio tre senrepoza?  
Do, me nun futuez me per ca Espado Magiala  
Til ke mea sango ekfluos e me ne plus esos.

LA KAPI DI INDIA, ZANZIBAR, E DAKOTA NORDALA.

Yes yes! Tu mortigez tu, tu ocidanta fekulo!

KARNOBRISES. Qui parolas?

KAPI. Yes yes yes! Tu mortez, e tale tu trompos la Fato!

KARNOBRISES. Yen, dio dum qua omna kapi renversas Naturo,  
Parolas per voci qui fendas la vulto di Cielo.  
Do dicez: Quon vi signifíkas per ‘trompos la Fato’?

KAPI. Pro lua motivi dementa e tre odiinda,  
La Fato destinas a tu ne nur la tota Mondo,  
Ma omna planeti en la Cielala sferegi.  
Ma sato. Nun mortez, e la Universo salvesos  
De tua sangoza durstego por profanacado!

KARNOBRISES. ‘La Fato destinas a me ne nur la tota Mondo,  
Ma omna planeti’! Ha, to esos granda amuzo!

KAPI. Ho monstra egoismo!

KARNOBRISES. Ma povas homulo, mem ulo tam forta kam me,  
Adsupre saltar de la globo dil Tero al steli?

*[Esforças saltar e falas.*

KAPI. Ha ha ha ha ha!

KARNOBRISES. Enirez la flami pro ta audacoza ridado!

KAPI. Yes, brulez ni, e tu nultempe saveskos moyeno  
Per qua onu povas flugar de la Tero al steli!

KARNOBRISES. Do, me vin ne brulos. Ma dicez quik la sekretajo,  
Od ya me vin brulos, e fidos a me ed a Fato.

*La KAPI murmuras inter su.*

KAPI. Nu, bone.  
Trans la barili di glaciizit precipisi,  
Trans la montegi eskarpa di Himalaya,  
Trans la ondoza mari di fora Japonia,  
Trans la furnazo-varmeso dil Valo di Morto  
Habitas la granda sorcisto *Imbrigrigllen*.

KARNOBRISES. Yen nomo qua tordas la langi di ni mortivuli!

KAPI. Ta mago imperas diabli ed omna demoni  
En tero, aero, ed aquo, ed anke en flamo.  
Kom lua vehilo lu facis kavalo ek fairo,  
Flugant tam rapide kam aglo o mem la kometo.  
La hufi frapanta la nubi genitas fulmino.  
Lu urinifanta, la pluvo pluvegas, e lua  
Flatuo es tondro qua ruptas, explozas Cielo.  
Lu ca kavalulon nomizis *Karbonblanko*,  
E *Karbonblankon* la Fato destinas por tu,  
Por ke tu devastez planeti e mem steli ipsa.

KARNOBRISES. Do trans la montegi, la mari, e trans la dezerti  
Me serchos ta *Imimbrigrigrigigllen*, la sorcisto,  
E lore koaktos la bestio sondar lua sedo!  
Nun aden ta flami por vi.

KAPI. Quo! Ma ni ya parolis,  
Parolis lo vera!

KARNOBRISES. Kad vi solicitas por vivo?

KAPI. Mem kom bagateli sur tua fekoza chareto  
La vivo es dolca, la morto es tre hororinda.

KARNOBRISES. Nu, lerne de me, *Karnobris*es, forteso viral—



La Morto es trista fushanto e nule timinda.  
Ma sato de filozofio!

[*Lu jetas la kapi aden fairo. Li kriachas e brulesas.*  
He! Venez, Mildrenda!

*Ri-eniras* MILDRENDA.

MILDRENDA. Adhike me venas, kareto e lordo potentia.

KARNOBRISES. Komprenez—uloke kavalo flugant men ekspektas.  
Pakigez valizi; me iros e serchos la Fato!

MILDRENDA. Kad un plusa fato? Ma kande ni du amoreskos?

KARNOBRISES. Debocho plu tarde, karino, nam nun me  
departas—

Planeti e steli ed anke Destino men vartas!

[*Li ekiras.*

# TRIESMA AKTO

*Eniras MILDRENDA portante la kapo putranta di NORVEGIA.*

MILDRENDA. Ca kapo, malgre ke ol es elegant kom ludilo  
(Ed anke habila pos ula lernado), nun putras  
Plu multe kam mem me tolerus. Tu, kara Norvegia,  
Mustas forirar.

NORVEGIA. Mea kar siorino *Mildrenda*,  
Mintal miozoto—!

MILDRENDA. Me tante regretas, kareto,  
Ma mem Karnobris la Brava la nazon fortunatas  
Pro la odoracho en mea bif— mea chambreto.  
Advenez, Kapitano Haldigo!

*Eniras* KAPITANO HALDIGO.

HALDIGO.                      Vua Profundesino.

MILDREND. Yen ica ludilo transvivas ultre utileso.  
Forprenez, forjetez ol — ma, Kapitano, jentile,  
Pro ke olu bone men servis.

HALDIGO. (*reverencas*)      Nesaturebleso.

*Ekiras MILDRENDA. HALDIGO repugnesante prenas la kapo.*

HALDIGO. I-yag!

NORVEGIA.      Haltez, yun *Kapitano*.

HALDIGO. Ho matro, men salvez!

L'objekto putranta parolas! Ha! [Faligas NORVEGIA.  
 NORVEGIA. Ha-ye!  
 HALDIGO. Ma quale?  
 NORVEGIA. Forprenez me ne!  
 HALDIGO. Ul demono posedas ol!  
 NORVEGIA. Ha-ye!  
 Ne jetez me aden la sterko-amaso!  
 HALDIGO. Pro quo ne?  
 NORVEGIA. Me helpos vu!  
 HALDIGO. Ka tu men helpos?  
 NORVEGIA. Yes, helpos! Salvez me!  
 HALDIGO. Ma ka desjuntita kapeto tro multe putranta  
 Ya helpos la brav Kapitano Enriko Haldigo?  
 NORVEGIA. E nur kapitano vu esas?  
 HALDIGO. Pro quo dicas 'nur,' vu?  
 Me es kapitano dil trupi dil grand Karnobrises.  
 NORVEGIA. E ka vu ne havas plu granda, plu alta ambicio?  
 HALDIGO. Shut! Mem pensar tal pensaji es granda trahizo!  
 NORVEGIA. Trahizo! Negar vua fato es vera trahizo!  
 La tota homaro vin dankus, se vu nur audacus.  
 Por vua destrukto di tala avida raptanto  
 Li nomos vu rejo ... od imperiestro ... mem deo!  
 HALDIGO. He?  
 NORVEGIA. Deo Haldigo!  
 HALDIGO. Lo sonas ya bone. Ma tacez!  
 Nam hike mem feko raportas a ta Karnobrises.  
 NORVEGIA. Tal ploretechant poltroneso ya nule konvenas  
 A vu, la homaro-salvonto.  
 HALDIGO. No, ma me transvivez.  
 NORVEGIA. Transvivo! Por quo? Vu nomas sklaveso kom vivo!  
 Yes, vu esas sklavo di du ocidanta bavanti!  
 HALDIGO. Nu ...

NORVEGIA. Quon facis ultempe por vu *Karnobrises*? Respondez!

HALDIGO. Lu igis me asasinar mea tota familio  
E talmaniere indulgis por me mea vivo.

NORVEGIA. Qual jenerozeso! Tu fakte adoptis l'etiko  
Inversa di ita brutulo. To es maladeso  
Qua es nomizita por mea chef-urbo.

HALDIGO. Ma, kapo—

NORVEGIA. E kande vu pozis espado al guto dil patro,  
Quon dicis l'okuli di ita oldulo? 'Ho, filio,  
Me joyas, ke tu tante bone obedias bastardo'?  
O ka ta okuli ekkriis pledante, 'Revancho!'?

HALDIGO. NO, lu dicis nulo. Me kovris la kapo per sako.

NORVEGIA. Ka lua fantomo ne venas aden vua sonji?

HALDIGO. Me fakte konfesas, me perdas poketa dormo.

NORVEGIA. Do savez me! Venjo por vu, e la patro dormeskos.

HALDIGO. Ne jokez. Il es nevinkebla.

NORVEGIA. E me savas quale!  
Dum nokto, pro la koaktata extazi donita,—

HALDIGO. I-yag.

NORVEGIA. —ta hundino revelis la mal sekretajo.  
L'infam *Karnobrises* nur vinkis la mondo per magio!

HALDIGO. Ho yes?

NORVEGIA. La espado stalal quon il portas diale  
Sorcita es, pro to on ilun ne povas vinkar.

HALDIGO. Nu, simpla logiko.

NORVEGIA. Ed ibe on trovos la venjo.

HALDIGO. Ma quale?

NORVEGIA. (Per Deo, ta granda stultulo!) Haldigo,  
Sen ita espado, la bestio es ya impotentia!

HALDIGO. E do?

NORVEGIA. Do? Do furtez l'espado, e vu regnos omno!

HALDIGO. [*Esforças pensar*] Mm-hmm. Ho. Ha-ha.

Hm-mm-mm. Me komprenas!

NORVEGIA.

Ho, fine!

HALDIGO. Ma qualmaniere me furtos de il ta pikilo?  
E die e nokte il portas ta kozo, mem kande  
Il plezas la leda *Mildrenda*. Ulfoye la hundo  
Koaktis me (tre regretinde) spektar.

NORVEGIA.

Qual diablo!

Askoltez: Ta kato-buganto *Testosteronides*  
Departos tre balde e facos mem plusa horori.  
*Mildrenda*, pervers nimfomano, preparas distrakto  
Per qua indulgar lia nauzeiganta amoro.  
Dum ita tre kurta agado, vu tirez sekrete  
L'espado de sua gaino. E lore vu povos  
Fendar la guturi di ta exkrementi, e regnos.

HALDIGO. Lo sonas sat bone.

*Trumpeti sonas.*

NORVEGIA.

Rejala adio komencas.

Ni mustas irar!

HALDIGO. Me konkordas.

NORVEGIA.

Nu, quik!

HALDIGO.

Yes, bonege.

[*Ekiras portante* NORVEGIA.]

*Eniras MILDRENDA.*

MILDRENDA. Ho ve, mea kara siniro men livas! Me donez  
Adio rejal per krear amuzili por ke  
Lu ne obliviez me. Hike konvenas por situo.  
Me hike erektos grand paviliono, plenigos  
Ol per mea maxim mola kuseni satina,

Qui plezos la grasa dopajo di la amoranto,  
E pose, ha, la mea propra plezos l'avanajo.  
Ho, sklavi!

Erektez caloke la paviliono!

[Klakas.

[Ekiras.

*Muziko. Eniras du SKLAVI qui erektas granda tendo. Li ekiras e ri-eniras multafoye portante kuseni, boteli de vino, fumanta incenso en poti, edc., aden la tendo.*

*Ri-eniras MILDRENDA duktante KARNOBRISES.*

MILDRENDA. Yen tanta beleso!

KARNOBRISES. Pro quo, mea kara gaino?

MILDRENDA. Me facos adio-futuo ne-obliviebla.

KARNOBRISES. Me ne havas tempo por plusa futuo, porkino!

Fluganta kavalo nun vartas me, anke Destino,

Ye la opozanta ter-fino! Me mustas hastar!

MILDRENDA. Tu dicas, ke tu hastos fore de ... ico?

[Pozas lua manuo a sua bifurko.

KARNOBRISES.

Hmm... ha... nu...

MILDRENDA. Ka?

KARNOBRISES. Damnez! Tu troe konocas me, kozo ruzoza!

MILDRENDA. Yes ya.

KARNOBRISES. Nu, bonege. Ma nur un hastoza. Nam  
sume,

La steli e kosmo ja vartas ca granda espado.

MILDRENDA. Ed anke me!

[Duktas lu aden la tendo.

*Eniras HALDIGO.*

HALDIGO.

Ed anke me!

*Terorinda jemado e karii sonas en la tendo. HALDIGO iras al tendo e  
palpas per manuo sub la tendo-klapo.*

HALDIGO. Hike ... no ... ma quo esas?  
No, esas poniardo e nula espado. Kad ico?  
Od ico? Ma no, ol es harda, ma varma.

MILDRENDA. [*Interne.*] Ho, yes ya!  
Yes, ibe, karulo! Ma—vartez. Ho ho, quant manui  
Tu havas?

HALDIGO. [*Quik ektiras sua manuo.*] I-yag! Kurajeskez, Haldigo!  
La Fato  
Ne amas poltrono. Itere, ma ne al bifurko.

[*Ripozas la manuo sub la tendo.*]  
Ha-ha! Me nun prenas ol!

[*Ektiras del tendo* KARNOBRISES *tenante lua harda penis.*]  
Ho, kara Deo!

KARNOBRISES. Ho yes, kara Deo! Ho, durez! Ma qua? Tu,  
Haldigo?

HALDIGO. Rejulo!

KARNOBRISES. Ma quon tu nun facas?

HALDIGO. Me ... vu ... ol ... ho Deo!

KARNOBRISES. Nultempe me opinionis ke tu men deziris.  
Ni do evidente dum kampaniar ya disipis  
Bontempi. Tu havas manui tre mola ...

HALDIGO. Ho, monstro!  
Me ne volis onaniar vu! Me volis ganar  
L'espado magiala!

KARNOBRISES. Quo!

HALDIGO. Donez a me!

KARNOBRISES. Fol stultulo!

ILI *luktas.* HALDIGO *abatesas.*

KARNOBRISES. Temerar imbecilo!

HALDIGO. Alteso!

KARNOBRISES. Ha! Tu evidente ne havas sat multa cerebri  
 Por ton komplotar. Dicz, qua tua sinon incendiis  
 Per tala dement ambicio?

HALDIGO. Yen, co!  
*[Ektiras de mantelo la kapo di NORVEGIA.]*

NORVEGIA. *[Sputanta.]* Idioto!

KARNOBRISES. Me devis savir. La fripona Norvegia! Me pensis  
 Ke tu ante nun diveneskis nur pur putrinteso.

NORVEGIA. Nultempe me putros til ke me ganabos la venjo!

KARNOBRISES. Me blamas ca temperamento tro jeneroza.  
 Nultempe itere! De nun, donacaji por mea  
 Mildrenda nur esos senanma. Leciono lernita.

NORVEGIA. Ultempe me ulmaniere tun vinkos, mal monstro!

KARNOBRISES. Sato por tu. *[Pedfrapas la kapo de la ceno.]*  
 E nun tu, Haldigo. *[Levas poniardo.]*

HALDIGO. Kompato, Alteso! Kompato por vua fidelo!  
 Revelez ta granda kompato fetida! Indulgez  
 La mizerikordio! Ho, lasez ca vermo vivar!

KARNOBRISES. Nu, tu esas feko-kapeto. Probable oportas  
 Pardonar tu pro ke tu sukombis a ruzi flatanta  
 Dil kapo tranchita.

HALDIGO. Vu esas ya justa! Oportas!

KARNOBRISES. E tu esis mea helpanto dum plura semani.

HALDIGO. Me esis! Me esis!

KARNOBRISES. E tu esas kelke beleta  
 E tua manui advere es mola.

HALDIGO. Me ... ha ...

KARNOBRISES. Do ...

HALDIGO. Danke! Ho, danke!



KARNOBRISES. No! [Poniardagas lu.

Yen! E nun altra! Ed altra!

HALDIGO. Me mortas! Ho Patro, ho Matro, fratuli, fratini,  
Ed omna onkluli, onklini, e kuzi ... me venas! [Mortas.

KARNOBRISES. Ha me. Kompatindo. Mildrenda!

*Ri-eniras MILDRENDA del tendo.*

MILDRENDA. Quon agas tu?

KARNOBRISES. Fushon me traktas quon tu kauzis,  
karo!

Pro mea indulgo pri tua peketa karnal  
Me preske perdis l'espado magial e sua povo!

MILDRENDA. Ka yes? Me regretas.

KARNOBRISES. Ho, me ne povas durar iracoza kontre tu.

MILDRENDA. Do, venez, kar amorantulo, ni nun ri-komenc—

KARNOBRISES. No!

Devo e sango imperas ke me avanirez!

MILDRENDA. Amoro!

KARNOBRISES. Un kiso! [Kisas elu.

MILDRENDA. Ka lango?

KARNOBRISES. La tempo forjiras!

Forirez, muliero! Me fugas tal diversioni

Por sizar la Fato per lua velkita kolyoni!

## QUARESMA AKTO

*Nokto. Eniras MILDRENDAd adsur la turmo.*

MILDRENDA. Nul dormo por me, nam me sonjis sonjo timinda,  
Predico pri ula danjero a la amorato.  
Me sonjis, ke l' fort *Karnobrises* enkarcerigesas  
En kolda kaverno sub monto brulanta, e ke  
Le Deo Potenta ipsa regardis e ridis  
Ke brav *Karnobrises* pro timo su urinifas.  
Ho Luno, gardisto virgina di kordii fidel,  
Shirmez mea karo, qua havas la maxim varmega  
Fosto quan me dum la vivo joyoze flutagis.  
Anke, se posible, ridonez ul mento-saneso  
Al kapo vakua di mea tre kar futuanto.

[*Ekiras.*

*Eniras IMBRIGRIGLLEN.*

IMBRIGRIGLLEN. Yen hike, mikreg audantaro, la grand  
*Imbrigrigllen,*  
La maxim brilega sorcisto en la tota mondo!  
Me lernis la verki di Hermes Trismegistus,  
Me pruvis l'erori dil saja Kornelius Agrippa,  
Me montris sofismi di olda stulteg Aristoteles,  
Til ke me, *me ipsa, Imbrigrigllen,* fine divenis  
La maxim povoza sorcisto nuntempe vivanta.  
Facile me transformas fero ad oro, a platino;  
Fabrikas homunkuli segun mea kaprici;

Imperas planeti en lia orbiti, mem haltas  
La Suno ipsa en lua kurado cielal.  
Per mea manuo, me—

*Eniras* DIABLETO.

DIABLETO. Mastro! Ho Mastro mea!

IMBRIGRIGLLEN. Pro quo tu audacas interruptar monologo?  
Quo esas?

DIABLETO. On vidas, ke ilu nun pluproximeskas!

IMBRIGRIGLLEN. Qua?

DIABLETO. L'omnavinkant *Karnobrises Testosteronides!*

IMBRIGRIGLLEN. Ka yes?

DIABLETO. Ho Mastro, lu per sua propra pekoza manui  
Extirpis la tota populi di Asia ed Europa!

On dicas, ke lua sputo genitas serpenti,

Ke lua flatui asfixias tota urbi!

IMBRIGRIGLLEN. Pro quo lu advenas?

DIABLETO. Lu volas kaptar la kavalo,  
Fluganta kavalo quan vu ek la fairo facabis,  
*Karbonoblanko.*

IMBRIGRIGLLEN. Karbonoblanko! Lu pensas  
Vinkor me? Sensenca! Ka lu opinionas ke me  
Es nur ula febla rejulo od imperiestro?  
Kaptita tam simple kam ul murizita urbeto?

DIABLETO. Me ne savas, ma me quik fugas. [Ekiras.

IMBRIGRIGLLEN. Tedanta mortivo! Do, ante ke lu mortabos  
Me docos a lu estimar ica granda mago!  
*Karbonoblanko!*

*Eniras* KARBONOBLANKO.

Yen mea bebeo, yen mea karetetuto!  
 Lu esas la dolca bonbono di lua patreto,  
 Ka ne? Ho yes, mea beleg dorlotato miniona!  
 E nun mala homo deziras sizar tu de me.  
 Ha ha! ma me pozos cirkume fortreso tre forta,  
 E pose me ludos kun lu quale kato til morto!  
*[Plankantas.] Sint mihi Götter acherontis propitij, ignei, aërij,*  
*aquatici spiritus caluete, Orientis Prinz Belsibibubl, infernal fekiit*  
*monarcha & demigorgon, propitiamus vos, et muro inuisibile*  
*protege equum meum.*  
 Nun tu es gardata da muri ek stalo sorcita  
*[Frapetas la muro nevidebla.*
 E nevidebla ed anke nepenetrebla.  
 E nula manuo ecepte la mea tun tushos,  
 E nulo ma me povas ica charmego ruptar.  
 Nun irez, *Karbonoblanko*, a vua liteto  
 Til ke me haltigas l'insulti di ta bubegacho.

*Ekiras KARBONOBLANKO.*

KARNOBRISSES. *[Extere]* He ho! *Karnobrises Testosteronides* nun  
 venas!  
 Ya durstas l'espado por sango, e me por amuzo!  
 IMBRIGRIGLLEN. Ho Arogantulo! Ho, bona punison vu sufros  
 Per mea sorcado; do venez a vua ruino! *[Desaparas.*

*Eniras KARNOBRISSES portante sua Espado.*

KARNOBRISSES. Nu, ube es ita famoza sorcisto, per feko?  
 Me nula vizajo vidabis ma mea propra  
 Depos ke me iris tra la flamifanta Mort-Valo.  
 Vakua es ta koridori, nul sono perturbas

La nauzeiganta silenco. Kad omni forfugis  
Nur pro mea nomo? Ha ha! Li es omna poltroni.  
Ho brav *Imbrigrigllen*, ho tu estiminda sorcisto,  
Me opinionis, ke hike me trovus adverso  
Plu digna di mea sudoro. Ma ha! Quo advenas?

*Eniras DIABLETO vestizita kom homino seduktanta.*

Ho van *Imbrigrigllen*, ka vu a me sendas hundino  
Por me distraktar de la violacado e spolio?  
Do venez e donez a me vua lango, morbozo!

[*Embracas e kisas la DIABLETO.*

Men brulas tal kisi!

DIABLETO. Mea kisi nur brulas por vu!

KARNOBRISES. La pesto a vu kom varmega putano!

DIABLETO. Me vartas!

KARNOBRISES. Fetida odoro di sulfo ecitas me nule.

DIABLETO. Shovez ta hardajo aden mea groto, bravulo!

KARNOBRISES. E tale brular mea hari pubiala? Ho no!

Fumanta eskombro-amaso! Sat tempo pri vu.

[*Esforcas espadagar la DIABLETO, qua desaparas.*

Qua magio es? *Imbrigrigllen*, ka tala kind-ludi  
Tu ludas? Pork-homo poltrona, ekvenez a me,  
Kombatez kun me, e me montros a vu sendubite  
Ke mea espado plu forta es kam vua kolo!

*La kurteni fortiresas por revelar OMBRO-DIABLETI menacanta.*

Ha! Qual diableti jetita ek flami infernal  
Minacas me vane? Nul timo. Espado d'Ulriko,  
Vua stalo es mastro di irga unglo di ombro!

*Batalio. KARNOBRISES fortranchas la ombro-skreno, pose forjetas la plata DIABLETI.*

Ta nesubstancial, plat, febla, karton enemiki  
Ne povas nocar mea stalo-gardita rumpacho.  
*Imbrigrigllen*, sato de jigi, jokaji, e djin-i.  
Ca mea espado aspiras hakar tua kapo,  
E ca mea fosto aspiras stekar ta okuli!

*Eniras IMBRIGRIGLLEN.*

IMBRIGRIGLLEN. Tu fanfaronanta, biloza, puzoza pustulo!  
Tu ne esas digna la tempo por me perforar tu!  
KARNOBRISES. Forigez ca tro longa vorti, e vice kombatez.

IMBRIGRIGLLEN *transformas su a giganta VESPERTILIO.*

KARNOBRISES. Ka plusa ludili? Perucho, me tun quik amansos!

*LU saltas adsur la VESPERTILIO e strangulas ol. La VESPERTILIO liberigas su e transformesas a giganta VESPO, qua persequas*  
KARNOBRISES. *LI duelas per espado e pikilo. La VESPO transformesas a flamo-exhalanta DRAKO. KARNOBRISES urinifas por extingar la flami.* IMBRIGRIGLLEN *sputante riprenas sua propria formo e*  
KARNOBRISES *espadagas lu.*

IMBRIGRIGLLEN. Mortante, me maledikas tu, *Pornobrises!*  
Ma mortas joyoze, malgre polutita da piso,  
Pro ke me certigis ke tu nulatempe posedos  
Karbonblanko!

KARNOBRISES. Ka yes, gutifanta anuso?

IMBRIGRIGLLEN. Askoltez nun mea fatal malediko ye tu—

Unesme, l'etern malediko di skabio-ekzemo,  
Por ke tu nultempe eskapos sencesa prurito.

KARNOBRISES. Stultulo frivola, me ja havas pelo squamoza—  
Magio ne esas necesa por tal aflikteti.

IMBRIGRIGLLEN. Duesme, la grav malediko di grand hemoroidi,  
Qui kreskos plu larje kam reda grenadi del kulo!

KARNOBRISES. Do, lore me olin ektranchos per mea espado  
E nutros per oli la sklavi dum festo-dii.

IMBRIGRIGLLEN. Triesme, l'obcen malediko di malodorego.  
Quan nulu nultempe efacos per balno od sapo,  
Parfumi od flori, e qua quik mortigos flaranti.

KARNOBRISES. Fu! Ito es tre rancodoro, mem a mea nazo,  
Ed ol kustumale savuras l'odori malega.  
Sorcisto damnit, esez maledikata tu ipsa!

IMBRIGRIGLLEN. Ha ha ha —me mortas! Me mortas! Me mort—  
[Mortas.

KARNOBRISES. Ed anke disipis la tempo mortante, bastardo!  
Ho ve! Me odoras de feko kovrit per limoni!  
Pisoza hieno, me traktas tu tale! E tale! [Profanacas la kadavro.  
Sat vana amuzo. Me devas trovar ta kavalo.  
*Karbonoblanko!* Ube tu esas, bestio?

*Eniras KARBONOBLANKO.*

KARNOBRISES. Belega miraklo! Ho kavalatra animalo!  
Tu venez a patro!

KARNOBRISES *kuras a KARBONOBLANKO, ma frapas la muro*  
*nevidebla.*

Qua charmo nun baras me hike?  
[Esforcas penetrar itere.

Me ne povas lun atingar! Ha, semin-amaso!

[*Itere profanacas la korpo.*

Tu esas ja morta, ja morta, ja morta! Do lasez

Me tua kavalon havar! Lasez me! Lasez me!

[*Montras aceso di iraco.*

Co esas neyusta! Neyusta! Ya me deziregas

Kavalo fluganta! Me mustas havar ta marvelo!

Es vana. La vivo es nun senvalora. Me faliis.

Me esas plu basa, plu nauzeiganta kam feko.

Do venez, Espado, e mordez la sino di ulu

Quan tot Universo mokas kom homo ridinda,

Ed omna dolori haltigez per un morto-stroko. [*Preparas ocidar su.*

*Aparas viziono di MILDRENDA.*

MILDRENDA. Soldati di la Sha di Persia pluproximeskas,

Ocidas la tota popolo avan li! Ho, ube,

Ho, ube es mea amorat *Karnobrises*? Me mortos ...

*La viziono desaparas.*

KARNOBRISSES. *Mildrenda!* La maxim dolca vulvo quan me lekis!

El es en danjero, e me nun disipas la tempo

Per van su-ocido. Videbla o ne, ico krulez!

Iosua kruligis la muro di Ieriko per korno—

Per sedo me sonos por nun kruligar e vinkar!

*Turnas e flatuas longe e laute, e pose penetras a KARBONOBLANKO.*

KARBONOBLANKO. Ne!

[*Kabras retroe pro la malodoro di KARNOBRISSES.*

KARNOBRISSES. L'odoro tre balde divenos parfumo a tu,



Tu bestio belega. Nu, quale ta kozo funkcias?

KARNOBRISES *acensas adsur* KARBONOBANKO, *qua saltas aden la  
aero.*

Triumfo! Ni flugez por aplastar ta Persiano

Retroe a Persia ed aden l'utero matral.

Ta Sha, ta latrino-fosato saveskos la venjo

Quan me, *Karnobrises Testosteronides*, adportas!

Simile ad aglo me frapos ta feko e vinkos!

*Mildrenda!* Braveskez! Me aden ta vulvo ya sinkos!

[*Ekiras.*

## KINESMA E FINALA AKTO

*Eniras la SHA DE PERSIA, qua repulsas MILDRENDIA per sua pedo.*

MILDRENDIA. Ho! Ho!

PERSIA. Plue kriez, putano morboza!

MILDRENDIA. Kompato!

Mizerikordio!

PERSIA. Nul mizerikordio por tu,  
Tu sordidachino havanta tro larja kuniacho!

MILDRENDIA. Yust dei in cielo, men venjez! Ube *Karnobrises*?

PERSIA. Yes, kriez por ita obscena frayacho di kraso!  
Tot vane ekkriez, nam tun *Karnobrises* ne helpas!

MILDRENDIA. Ma quon vu intencas, mal monstro?

PERSIA. Ha! Ka tu ne savas

Ke l' mago quan ita fetida kul-truo defiis,  
*Imbrigrigllen*, ilun transformis de nur dementulo  
A rospo ledeg, repugnanta, e mem gangrenoza?

MILDRENDIA. Ho ve! Ma no, no! Me ne fidas a vua vortachi.

PERSIA. Yes, fidez e kredez! Pro quo, pensas tu, nun revoltas  
La omna populi qui pagis tributo al bruto?  
Pro ke la rumoro pri l' falo di ta *Karnobrises*  
Quik kuras tra l' mondo simile ad pesto di joyo!

MILDRENDIA. Ha no! *Karnobrises*! Impetuoze amoranto!  
E ka tu nultempe ca mea sekreta pordeto  
Itere atakos per tua paliso masiva?  
Do triste pruvita es mea koshmaro. Ho Luno,  
Vu falsa deino, ka talmaniere vu trompas

On tante devota qua juris a vu sua vivo?

PERSIA. Nun klozez ta boko sordida, hundino leproza!  
Ni havas tu en nia povo, konkluze, e venjos  
Per tu la krimini di tua infama sinioro.

Advokez e sendez a me la sklaveg *Gargantula*!

MILDRENDA. Ma nun qua hororin inventas vu por me, diablo?

PERSIA. Komence, gigant *Gargantula* paruzos ta tua  
Putrant aperturi.

MILDRENDA. Torturo por me lo ne esas.

PERSIA. Vidante la picho di grand *Gargantula*, tu timos.  
Ol stacas plu alte kam turmo, plu larje kam strado.  
Tu quik konoceskos l'amoro-dolori, hundino. [Ekiris ridante.

MILDRENDA. Pestoza anuso mukoza, nul sklavo timigos  
La spoza di brav *Karnobrises Testosteronides*.

*Eniras bavante GARGANTULA, penisio stacanta harde.*

MILDRENDA. Oi ve! Matro di Deo! Santa feko!  
Forstacez, me pregas! Mem mea kapaca gaino  
Ne povas envelopar tante granda penisio.

KARNOBRISSES. [Extere.] *Mildrenda! Mea Mildrenda!*

MILDRENDA. Qua voco perturbas l'oreli? Dolca *Karnobrises!*  
[Ekiras.

*Eniras KARNOBRISSES sur KARBONOBANKO fluganta.*

KARNOBRISSES. Durez, *Mildrenda*, me venas por salvar tu!  
Ho abomininda giganto sudorifanta,  
Me per ca espado kurtigos vu de un kapo!

*Kombato inter KARNOBRISSES e GARGANTULA. GARGANTULA sangifas  
de multa vunduri e fine KARNOBRISSES forlonchas lua penisio.*

KARNOBRISES. Ha ha! Vua karno enorma men nule submisas.  
Ma quo? Ka nun febla soldati advenas probar  
Ca mastro quan mem *Gargantula* ne povis vinkar?

SOLDATI *eniras unope*. KARNOBRISES *mortigas li omna*.

KARNOBRISES. Kad ilti es le maxim forta quin la Persiano  
Komandas? Do venez, vi trupi, legionis, armei—  
L'espado di *Karnobris* vin hachos por torti!

*Trupo de PIGMEI atakas ed esas senkapigita.*

KARNOBRISES. Ka nulu plusa? Ka nulu sat brav por probar  
L'akuteso di mea lamo sang-gutifanta?  
Ka forsan esas, ke nulu ankore vivas?

*Eniras PERSIA.*

PERSIA. Kruel futuanto dil matro! Quon nun facis vu?  
L'armei vinkita, nulloke me povas marchar  
Sen makulizar la pantofli per sango e feko!

KARNOBRISES. E vua fetid intestini kronizos l'amaso  
Di mea viktimi. Ka vu, lauso desestiminda,  
Audacis kaptar la spozino di me, *Karnobris*?

PERSIA. Ka vua spozino? Ta sifilisoza truacho!

KARNOBRISES. Poltrono! Me uzos ta lango sordid por vishar  
Ca mea dopajo fluanta per brun diareo!

PERSIA. Futuesez vu e la kavalo magial qua portas vu!

PERSIA *mokas KARNOBRISES per gesti obscena e montras sua gluteo.*

KARNOBRISES. La luno tro frue brilas en bela Persia.

[*Empalas la gluteo PERSIA per l'espado.*

PERSIA. Me violacesas!

KARNOBRISES. Ka vun delektas ca dildo?

PERSIA. Ho bestio homala! Aborto di porko morboza!

Pro quo facas vu ica kruelegaji sever?

KARNOBRISES. Pro quo? Pro ke me povas!

PERSIA. Me mortas. [Mortas.

KARNOBRISES. E tale ti omna qui stacas kontre mea furio.

[*Pulsas la kadavro per l'espado.*

Sordid exkremento sur mea espado! Fripono!

Ma ube la amaratino, la bela *Mildrenda*?

*Mildrenda*! Ho, ube es ta parfumoza bifurko?

[*Flaras e serchas la ceno.*

Nulube! Me trovas la kara lacivo nulloke.

Ho Fato krUEL, ka vu men abandonas? Ho ve!

Fut! Do ne ajornez la krulo final, *Karnobris*es.

Ne restez kom vana mokajo por vua viktimi.

Nu, venez, Espado d'Ulriko, brilanta lamego,

Tu kar donacajo de elua dolca manuo,

Expozez al nigra aero ta kordio velkinta. [Preparas su-ocidar.

MILDREND. [Interne.] *Karnobris*es! Mea *Karnobris*es!

*Eniras* MILDREND.

KARNOBRISES. *Mildrenda* vivas!

*LI embracas.*

KARNOBRISES. Me havas itere la maxim profunda puteo!

MILDREND. E me la mashino di mea deziri. Ma fui!

Quo esas ta mal odoracho preske mortiganta?

KARNOBRISES. La sodomiant *Imbrigrigllen*, ta mala sorcisto,  
Per to maledikis me. Anke per grand hemoroidi.

MILDREDA. Ma mea amoro ne falius, ne se tu odorus  
De omna fekaji quin homi ultempe fekifis.  
Me ne timis la penisego di ta *Gargantula*  
Pro ne-evitebla doloro, ma pro ke por sempre  
La dolca tenseso di ca virginala vagino  
Por tu esus sume e tote, ho ve! laxigita.

KARNOBRISES. Tu esas l'unika kreito ne-egoista  
Me trovas en ica mondumo kruel. Ma, venez!  
Nam nova destrukto nun vartas ni inter planeti!  
Per *Karbonoblanke*, kavalo fluganta, ni portos  
Ocido, masakro, dizastro, e peko al steli!

MILDREDA. Ma kar *Karnobrises*, kad ica danjeri recenta  
Ne igas tu fine restar che me en repozo?

KARNOBRISES. Nultempe!

MILDREDA. Renuncez la sercho por nova krimini, e vice  
Futuez me nun e sencese, e juez la paco.

KARNOBRISES. Kun *Karbonoblanke*, nun mem la cielon ipsa  
Me darfas per mea hardajo enorm futuar.  
Me vinkos planeti ed asteroidi e luni,  
Me domtos la steli ipsa por lumizar ni!  
Me donos a tu la kometi kom bel koliaro,  
Por tu kold Saturno esos orelo-ringegi.  
Ma me por me ipsa retenos la orbo Urano.

MILDREDA. Se ton tu deziras, nu, me ya konkordas.

KARNOBRISES.

Bonege!

Destrukto di omno es ya la homaro-destino!  
Pro to ni kreesis, e me kom la kolmo e fino!  
Do ni ne disipez la tempo per van rukulado—  
Ca mea rumpacho avide deziras krulado.

Sen sango, ca kaudo ne stacas por santa amor.  
Ni amba bezonas l'inspiro di ula hororo.  
Ho fugez, Merkuro, e Jovo, e Marso—vi dei  
Nun mustas irar al klasika moldoza muzei.  
Nam me, *Karnobrises*, e mea belega konsorto  
Elevas ni por aplastar via kapi kom sporto!

LI *ekiras e ri-aparas sur KARBONOBANKO flugante en la cielo.*

Melodio. — “*O terr’ addio*” da Verdi.

*Adio, Tero, tu amaso di fango.  
Me venas serchante avide la sango.  
Me ocidos omna fekoz planeti  
Ed aplastos la steli per mea stango.  
Adio, Tero, gutifant abceso.  
Ni dronos l’Universo en sordideso.*

FINO



